

la Vostra Serenità et con la santa madre Chiesa. Si risponde, che semo contenti del barisello non possa tuor, per le executione el farà de le sententie, salvo quello si contiene ne le concessione hanno da la Signoria nostra.

Decimo: ne restarebbe ancora un'altra a dire, la qual se pasarà con silentio, perchè si rendemo securi che la Serenità Vostra habia dentro del core per raccomandata; a la cui bona gratia tutti inclinati ci raccomandiamo, con riverente basio de le mane. Si risponde, che stiano di bono animo perchè certamente se proverà subito a le cose sue, de maniera che resterano satisfati de la Signoria nostra.

Undecimo: apresso se ritorna a suplicare che sia dato a la dita comunità in dono il datio de le 2000 tavole et de li 20 scaloni, et de le 60 schiavine promesso già fano molti dì, aziò che si possa mettere la citadela et la rocha in conzio, et il loco ditto il Guasto, già albergo antiquamente assignato a li soldati de la illustrissima Signoria. Si risponde *quod fiat ut petitur*.

242 *A dì 14.* La matina, vene in Collegio l'orator di Milan.

Vene sier Tomà Mocenigo electo orator al Signor turco, et refudò, atento è stato longamente amalato et non potria andar per terra in questo tempo de inverno.

Da poi fo ordinà Pregadi per far in loco suo Orator al Turco.

Da Fiorenza, del Foscari orator, di 11
Come haveano hauto de li la nova del zonzer del Papa a Orvieto; *item*, erano mutadi quelli signori nuovi, et fato commissario in campo . . . Soderini, qual si tien non andarà. Scrive, hano aviso di l'armada le nostre galie esser zonte et salve in quelli porti come scrisse, et la galla francese, fo dito era rota, non fu vero, et l'altre nostre galie esser andate verso Corsicia.

Fu posto, per li Savii, una lettera a sier Piero da chà da Pexaro procurator, orator a Lutrech, in risposta di soe, zerca la richiesta fata per monsignor de Lutrech che si mandi li danari per pagar li lanzinech; et a questo se li risponde.

Et sier Gabriel Moro el cavalier et sier Filippo Trun, sier Francesco Morexini savi a terra ferma voleno che prima esso procurator Pexaro digi che semo contenti pagarli al tempo i zonzerano, et pur vedendo a questo non si aquietasse, li digi che li daremo li 10 milia ducati venendo

fin 8 zorni, et non venendo, se meterà a conto de l'altra paga li doveremo dar *ut in parte*.

Et parlò prima sier Gabriel Moro; li rispose sier Valerio Marzello. Poi sier Filippo Trun, poi sier Marco Antonio Grimani. Andò le parte . . . volte, a la fin di poco fu presa la prima.

Fu posto, per li Savii ai ordeni, prestar a sier Hironimo Justinian qu. sier Beneto alcune cose di l'Arsenal per meter la so' nave a carena. Ave: 136, 14, 4.

Fu poi posto, per li Savii ai ordeni, una parte di far capitani di le barze si lavora in l'Arsenà, et do patroni, molto longa et con molte clausule *ut in ea*.

Et sier Hironimo da chà da Pexaro savio del Conseio, è Proveditor a l'Arsenal, et li Patroni a l'Arsenal feno lezer quanto bisogna per spexe di l'Arsenal, et volendo compir le barze, et voleano meter a l'incontro che la tansa prima et seconda fosseno mandate a le Cazude, et scosse per li scrivani secondo la forma di le decime, et quello si scoderà sia deputà a l'Arsenal etc.

Et li Governatori andono a la Signoria dicendo loro scuodeno, et li scrivani vorano 20 per 100, adeo la parte et una et l'altra fo mandà a monte.

Scurtinio di Orator al Signor turco, in luogo di sier Tomà Mocenigo ha refudado.

Sier Marin Morexini fo savio a terra ferma, qu. sier Polo	49.126
Sier Alvise d'Armer fo Cao del Conseio di X, qu. sier Simon	51.131
+ Sier Tomà Contarini fo savio a terra ferma, qu. sier Michiel	126. 52
Sier Carlo Contarini fo savio a terra ferma, qu. sier Panfilo	64.113
Sier Nicolò Zustignan fo capitano et proveditor a Napoli di Romania, qu. sier Bernardo	50.130
Sier Antonio Zustignan fo di Pregadi, qu. sier Francesco el cavalier	47.133
Sier Filippo Trun savio a terra ferma, qu. sier Priamo	61.113
Sier Ferigo da Molin l'avogador, qu. sier Marco	56.126
Sier Antonio da Mula el Consier, qu. sier Polo	61.124
Sier Francesco Morexini savio a terra ferma, qu. sier Nicolò	57.120
Sier Michiel Morexini fo savio a terra ferma, qu. sier Piero	73.103